

**Uunga siunnersuut: Aatsitassat pillugit ingerlatallu tamatumunnga pingaarutillit pillugit Inatsisartut inatsisaata allanngortinneqarnera pillugu Inatsisartut inatsisaat nr. xx, xx. xxx 2018-meersoq. (aatsitassanut ikummatissanullu inatsit)**  
(Aatsitassanut, Suliffeqarnermut, Nunamut Namminermt Nunanilu Avannarlerni Suleqatigiinnermut Naalakkersuisoq)

### **Saqqummiussissut**

(Aatsitassanut, Suliffeqarnermut, Nunamut Namminermt Nunanilu Avannarlerni Suleqatigiinnermut Naalakkersuisoq)

### **Siullemeermeqarnera**

Naalakkersuisut sinnerlugit matumuuna aatsitassanut ikummatissanullu inatsisip allanngortinneqarnissaanut siunnersuut saqqummiuppara.

Siunnersuut, erngup nukingata innaallagissiornermut atorneqartarnera pillugu Inatsisartut inatsisaannut siunnersuummut, 2018-imi ukiaanerani ataatsimiinnermi akuerineqartussat naatsorsuutigineqartumut, ataqatigiissillugu saqqummiunneqarpoq. Aatsitassanut ikummatissanullu inatsisip allanngortinneqarnissaanut siunertaavoq, aatsitassarsiornermik suliassanut atatillugu erngup nukinganik atuinissaq pillugu qinnuteqaatit siunissami erngup nukingata innaallagissiornermut atorneqartarnera pillugu Inatsisartut inatsisaat malillugu suliarineqartarnissaat.

Maannamut aatsitassarsiorluni suliassanut atatillugu erngup nukinganik atuinissamut akuersissummik pissarsinissamut, pisinnaatitsissummik pigisaqartup aatsitassanik peqarfeqarneranik takussutissaqartitsinera aammalu niuerneramik tunngaveqartumik piiarneqarsinnaasumik killissalersuisimanissaa, apeqqutaasimavoq. Piumasaqaat taanna naammassiniarlugu pisinnaatitsissummik pigisaqartup imminut akilersinnaassutsimik misissuilluni, suliassanut aningaaserivimmit aningaasalersuinissaq anguneqarsinnaasoq, uppersarsinnaasussaavaa. Erngup nukinganik nukissiorfiliornissaq annertoorujussuarnik sanaartornermut aningaasartuuteqarfiusussaasarmat, aammalu erngup nukinganik nukissiorfik nalinginnaasumik aatsitassarsiorluni suliassamit sivisunerusumik atasussaasarmat, suliaqarnermi paasinarsisimavoq taamatut maleruagassiinikkut ataqatigiissitsineq ajornakusoortoq naleqqutinngitsorlu.

Taamaattumik erngup nukingata innaallagissiornermut atorneqartarnera pillugu Inatsisartut inatsisaata nutaap akuerineqarneranut atatillugu, erngup nukinga pillugu aalajangersakkat tamarmik Inatsisartut inatsisaanni tassani ataatsimoortinneqarnissaat, naleqqussorineqarpoq. Erngup nukinganik aatsitassarsiorfimmut inaallagamik pilersuinissamut atuinerup erngup nukinganut ingerlatseqatigiiffiup aamma aatsitassarsiorfiutleqatigiiffiup akornanni isumaqatigiissut naapertorlugu pisinnaanissaa, tamatuma ajornarunnaarsissaavaa.

Aammattaaq siunnersuut sunniutaasunik allanngortitsinernik imaqarpoq, tassami kommunalbestyrelsit aamma nunaqarfinni aqutsisut il.il. pillugit Inatsisartut inatsisaat, kommunit aqunneqarnerat pillugu Inatsisartut inatsisaannit taarserneqarsimammat.

Naggataatigut inatsisissatut siunnersuut aammalu nassuiaatit tassunga atasut innersuussutigissavakka.

Taamatut oqaaseqarlunga Naalakkersuisut sinnerlugit siunnersuut Inatsisartunut suliarineqartussanngortippara.